



ABAI: Adamzattyń b́arin śı baýyrym dep.

Аймақтық қоғамдық-саяси газет

Газет 1932 жылдың 1 мамырынан бастап шығады

BALQASH ONIRI

balqash_oniri_gazeti

balkhashoniry@mail.ru

№31 (13404), 6 МАМЫР, СӨРСЕНБІ, 2025 ЖЫЛ

Еркеназ БАҚТОРАЗ,
«BALQASH ONIRI»

✓ЕРТЕҢ – ҚР ОТАН ҚОРҒАУШЫСЫ КҮНІ



Жігер берген «Жас сарбаз»

ЖАСТАР БОЙЫНДА ОТАНШЫЛ-ДЫҚ СЕЗІМДІ ҚАЛЫПТАСТЫРУ ЖӘНЕ ОЛАРҒА ӘСКЕРИ-ПАТРИОТТЫҚ ТӘРБИЕ БЕРУ – МЕМЛЕКЕТІМІЗ ҮШІН МАҢЫЗДЫ БАСЫМДЫҚТАРДЫҢ БІРІ. ҚАЗАҚ ХАЛҚЫ ҚАЙ ЗАМАНДА ДА ҰРПАҒЫН ІЗГІЛІККЕ БАУЛЫП, ОТАН-СҮЙГІШТІККЕ ТӘРБИЕЛЕГЕН. ЖАҢА ЗАМАНДАҒЫ ЖАС ҰРПАҚТЫҢ РУХЫН КӨТЕРІП, ЖЕКЕ ТҮЛҒАНЫҢ РУХАНИ ЖӘНЕ ШЫҒАРМАШЫЛЫҚ ДАМУЫНА ЫҚПАЛ ЕТУ, ӨЗІН-ӨЗІ ДАМУ, КӘСІБИЛІК ПЕН БӘСЕКЕГЕ ҚАБІЛЕТ-ТІЛІК, СЫНИ КӨЗҚАРАС ПЕН ОЙЛАУДЫ ЖЕТІЛДІРУ, СОНДАЙ-АҚ, АДАМИ ҰСТАНЫМДАРДЫ ҚАЛЫПТАСТЫРАТЫН ТӘРБИЕ БЕРУ ЖӘНЕ ТӘРБИЕЛІК ОРТАНЫ ҚҰРУ МАҚСАТЫНДА ҚАЛАМЫЗДАҒЫ БАУЫРЖАН МОМЫШҰЛЫ АТЫНДАҒЫ МЕКТЕПТЕ «ЖАС САРБАЗ» СЫНЫБЫ 2012 ЖЫЛДАН БЕРІ ЖҰМЫС ІСТЕП КЕЛЕДІ. ОТАН ҚОРҒАУШЫЛАР КҮНІ ҚАРСАҢЫНДА БОЛАШАҚ ОТАНЫН ҚОРҒАЙТЫН ЖАС САРБАЗДАРДЫҢ БҮГІНГІСІН АНЫҚТАЙЫЗ...

Жас жеткіншектерге әскери-патриоттық тәрбие берудегі жалпы білім беретін орта мектептердің маңызы айтпаса да түсінікті.

Өйткені, ел мен жерге еге болар ертеңгі ел азаматтарының интеллектуалдық, мәдени, физикалық және адамгершілік қасиеттерін дамыту, жасөспірімдерді әскери және азаматтық тұрғыда Отанға қызмет етуге дайындаудың негізгі баспалдағы осындай бағытта жұмыс істейтін арнаулы оқу орындары мен жалпы білім беретін мектептердің жекелеген сыныптарында іске асырылады.

«Жігерлі «Жас сарбаз» жастардың саламатты өмір салтын ұстануына, денешынықтырумен және спортпен шұғылдануына, жоғары ерікті қасиеттерді нығайтуға деген ұмтылысын жаппай қалыптастыруға бағытталған. Болашағы жарқын «Жас сарбаз» өскелең ұрпақты тарихқа, тәуелсіздік жетістіктеріне баулуға, қазақстандық патриотизмді және өз Отанына деген адалдықты нығайтуға негізделген. «Жас сарбаз» сыныбы 5-9-сынып оқушыларын қамтиды. Бауыржан Момышұлы атындағы мектепте биылғы оқу жылында 92 сарбаз білім алуда. Бұған дейін аталған сарбаз сыныбын 152 түлек бітіріп шыққан. «Жас сарбаздар» сыныбының оқу-тәрбие үдерісі арнайы кесте бойынша жүргізіледі. Оқушылар 07.30-дан 16.30-ға дейін мектепте болады. «Жас сарбаздар» сыныбына стандартқа сай бағдарламаны меңгерумен қатар, екінші ауысымда қосым-

ша сабақтар жүргізіледі. Қосымша сабақтар жүргізу нәтижесінде жасөспірімдер физикалық дамуы үшін жұмыс жасайды, өзінің қандай салаға бейімді екенін анықтайды, психологиялық, физикалық дайындығын жетілдіреді, сабақтан тыс уақытта өзіне пайдалы істермен айналысады, шыдамдылық дағдысы қалыптасады.

«Жас сарбаз» сыныбының оқушылары қосымша бағдарламалар нәтижесінде әскери тәртіп дағдысын алып, әскери саппен жүруді толық меңгеріп, заманауи деңгейде саптық дефиле жасауға машықтанады. Сондай-ақ, Қазақстан Қарулы күштерінің құрылымы, тарихы туралы мәліметті меңгереді. Сарбаздар салауатты өмір салты берік ұсталынып, күшейтілген түрде дене даярлығымен шұғылданады, әрбіреуі спорттық секцияларға қатысады. Сонымен бірге хореография сабақтары да қамтылады. Жас сарбаздардың танымдық іс-әрекеттерін, интеллектуалдық және шығармашылық қабілеттерін дамыту, өзіндік қажеттіліктерін қанағаттандыратын білім алуға ұмтылдыру, мамандық таңдауға бағыттау мақсатында «Биофизика», «Математикалық логика», «Ағылшын тілі» қосымша сабақтары кестеге сәйкес жүргізіледі.

(Жалғасы 2-бетте)



**Қымбатты
балқаштықтар!
Тыл еңбеккерлері мен
майдангерлердің
ұрпақтары!**

Жеңіс күні – батырлардың даңқты рухын ардақтап, Отанға адал қызмет етуге, аға ұрпақтың ерлігін мәңгілік ел есінде сақтауға арналған ең қастерлі мереке. Бұл Жеңіс – бүкіл соғыс ардагерлері мен тыл еңбеккерлерінің қажымас қайратының, қайсар рухының жеңісі.

Ерлік – елге мұра, ұрпаққа – ұран. Арын – байрақ, намысын найза қылған ерлердің қаһармандығы аңызға айналды. Адамзат тарихындағы ең сұрапыл соғыста біздің жерлестеріміз қайсар ерліктің үлгісін көрсетіп, есімдерін тарих бетіне алтын әріппен жазды. Тыл еңбеккерлері де майдан үшін, жеңіс үшін жанқиярлықпен еңбек етіп, жауынгерлерді қару-жарақпен, азық-түлікпен қамтамасыз етті. Бүгінгі ұрпақ аға буын-ардагерлер танытқан қаһармандық пен қайсарлықтан үлгі алып, бой түзейді.

Құрметті қала халқы!

Ерлік ешқашан өшпейді. Ол ұрпақтар есінде мәңгі сақталады.

Баршаңызға зор денсаулық, балаларыңыз бен немерелеріңізге жарқын болашақ, бақ-береке, еліміз бен жерімізге бейбіт өмір тілейміз.

Жеңіс күні құтты болсын!

**Сапар САТАЕВ,
Балқаш қаласының әкімі.
Ахат МҮСЛІМОВ,
қалалық мәслихат төрағасы.**

Құрметті Балқаш қаласының халқы!

Сіздерді еліміздің айбынды мерекесі – Қазақстан Республикасының Отан қорғаушысы күнімен шын жүректен құттықтаймыз!

Бұл күн – бейбіт елдің тыныштығын қорғап, өз тағдырын ел тағдырымен байланыстырған әрбір Отан қорғаушы үшін, әрбір сарбаз үшін ерекше күн. Бұл күннің мемлекетіміздің болашағы үшін маңызы жоғары, себебі әрбір қазақстандықтың қастерлі де құрметті міндеті – Отан қорғау.

Қазақстан Қарулы Күштерінің алдында бейбітшілікті, халықаралық және өңірлік қауіпсіздік пен тұрақтылықты нығайту, республика аумағының тұтастығын қорғау міндеті тұр. Бұл жас жауынгерлер үшін асқақ абырой екендігі сөзсіз. Сол себептен де антына адал, сертіне берік Отан қорғаушылардың мәртебесі мен мерейі әрдайым асқақ болары анық. Балқаш халқын осынау мерейлі мереке – Отан қорғаушы күнімен құттықтай отырып, дендеріңізге саулық, отбасыларыңызға амандық, елімізге береке-бірлік тілейміз!

Еліміз аман, жұртымыз тыныш болсын!

**Сапар САТАЕВ, Балқаш қаласының әкімі.
Ахат МҮСЛІМОВ, қалалық мәслихат төрағасы.**